


Diter Hitner, humanitarac i prijatelj naše zemlje

# Bosna je zauvijek zarobila moje srce

Prvi kamion lijekova odveo za ratno Goražde • Prokrstario Bosnom uzduž i poprijeko • Oduševljen Starim mostom u Mostaru i Višegradskom ćuprijom



*Hitner: Uvijek spreman pomoći*

*Piše:*

**Omer BOŠKAILO**

Bh. ratna drama i patnje bosanskohercegovačkog nevinog naroda tokom posljednjih ratnih zbivanja mnoge ljude širom svijeta nisu ostavili ravnodušnim, pa su se svojim angažmanom uključili u razne vidove pomoći našoj zemlji. Jedan od njih je i Nijemac dr. Diter Hitner (Dieter Hüttner), bivši direktor minhenske gimnazije, a omdedavno penzioner, kojeg sam igrom slučaja upoznao još dok je prije desetak godina slao konvoje za BiH, a kasnije ga svakodnevno susretao u Minhenu.



*Hitner u goraždanskoj MZ Ilovača*

## Profesor u Minhenu

Diter je rođen prije 65 godina u nekadašnjoj sudetskoj oblasti koja je do Drugog svjetskog rata pripadala Njemačkoj, a danas je dio Češke. Familija mu je prognana kad je imao samo godinu i skrasila se u Minhenu. Nakon završetka gimnazije, Diter upisuje studij pedagoških nauka i postaje profesor u jednoj minhenskoj školi. Potom završava postdiplomski i odlazi prvo u Kanadu, a zatim na Novi Zeland, gdje predaje u školama punih deset godina. Diter se u Njemačku vraća 1994. godine, upravo kada je u BiH rat

bjesnio punom snagom. Odmah se uključuje u pomoć.

- Kao jednogodišnjak preživio sam progon, a kasnije na svojoj koži osjetio surovost i teškoće izbjegličkog života. Pratio sam zbivanja u BiH i bio šokiran razaranja i masovnim ubistvima civilnog stanovništva. Riješio sam da upoznam tu novu evropsku državu i njene narode - govori nam na početku razgovora Hitner, koji je još za vrijeme studija, rađeći u raznim omladinskim organizacijama, štitio interese mladih prognanika koji su pristizali u Minhenu sa raznih strana svijeta.

Nedugo potom Hitner odvozi prvi kamion lijekova za BiH, tačnije u Goražde. Nakon toga je

u razne destinacije slao, a većinom bio i lični pratilac desetina kamiona koji su stizali u Bijeljino, Odžak, Konjic, Sarajevo... Puno je uradio i na sklapanju prijateljstava između škola iz BiH i Njemačke. Jednostavno, prijatelj Bosne koji danonočno radi na pomoći u svakom pogledu, a i predstavljajući same BiH u Njemačkoj.

## Važnost škole

- Mislio sam da je Novi Zeland najljepša zemlja na svijetu, ali sam se prevario. Kada sam prvi put ugledao bh. planine, bio sam zadivljen. BiH, tada ranjena, porušena, ali nepobijedena i prelijeva, zauvijek je zarobila moje srce. Patnje naroda za vrijeme, a i poslije rata preživljavao sam kao sopstvene. Zalažem se na svim nivoima vlasti gdje to mogu za ulazak BiH u Evropsku uniju - nastavlja Diter.

Nenametljiv, s blagim osmijehom, uvijek je spreman pomoći. Posebno se zauzima da bh. omladina pohađa dobre škole i fakultete jer, kaže, na svom primjeru osjetio je koliko je škola važna. Prokrstaro je Bosnom uzduž i poprijeko. Posebno su ga oduševili Stari most u Mostaru, Višegradska čuprija i spomenik braniteljima 92-95. u Goraždu.



Sa prijateljima kraj spomenika braniteljima u Goraždu